

Trīs beržā

Mūsa kēima pakraštīe
Pri garaža pēlka
Sklaiduos ē tujau tērštīe
Šakas žalē šēlka.

Vēns i vēršo, i žvaizdēs
Pasēnešēs baisē,
So vēršūnē ēšvaizdē
Do kētus vēn taisa.

Vuo svīruoklis muo anam
Tīstontēs vainēkās,
Nieka, bruoli, nežēnā
I savi ēnēkēs.

Kāp siūboutē īr gerā –
Saulēs vieji jaustē,
Ē ont laika atarās
Briežtē žalē skraistē.

Vuo tretiojou īr sunkiau –
Niekor ons nelondiuo,
Stērksa saulie atuokiau
Tuoks līg nosēgondēs...

Ons nenuor garbies keistuos
Žuodēs kor rēkiuojēs,
Ē puikībēs praskēistuos –
Lai kētē rokujēs...

Būn ons sava vēituo vēns –
Vēskuo īr ligi valē...
Ē i erdvēs nesruoven
Sava jausma žalē.

Jē jau triesni kou sotēks
Pamatīs be žuodiu –
Pats dēdiausis pasiotēms
Tēp tik pasēruoda.

Smelkas ons šakuos tako
I žēidieliu nervus,
Vuo paskou kvapās lekiuo
Kāp pēlkuojē gervē...

Ē sokraun rodam maiše
Sunkē sieklas lēmti,
Koront žemēs nolašies
Augtē ē gīventē...